

唐黃御史集卷之七

唐監察御史莆黃滔著

書

與王雄書

蒙示盛文拜納之日焉可無言某不業文誠可
儷偶其辭以贊方寸既再而思夫儷偶之辭文
家之戲也焉可賫其戲於作者乎是若揚優喙
干諫舌啼妾態叅婦德得不爲罪人乎是乃掃

降聲律直寫一二強名曰書幸垂聽覽頃越之
亭工遊蜀之錦肆錦工以之示肆人皆哂越工
曰誠絳雪之與梭霞異諸然其經緯之如此文
章之若彼咸言其極某今獲閣下之文雖莫我
知亦庶幾於越工之言蜀錦至如典謨之比寧
敢輒言若復韓校書兩寓沈先輩永崇高中丞
安邑劉補闕已上十篇書指陳時病俗弊敘述
飭躬處已講論文學興廢指切知已可否雖當

人俗士聞見之亦宜感動况吾曹平則知綿十
舉而未第者抑有由也夫以唐德之盛而文道
之衰嘗聆作者論近日場中或尙辭而鮮質多
閣下能揭元次山韓退之之風故天所以否其
道窒其數使若作騷演易皆出於窮愁也復何
疑焉今之人皆謂番禺駢寶貨遊者或務所獲
某之來也得閣下之文爲至寶奇貨克所獲豈
不厚於它人哉願閣下脂韞躍轡薦計貢闈高

取甲乙然後使人人知斯之寶貨異於是也元
次山韓退之之風復行於今日也無令鄭濬孫
泰李瑞閔廷言陳嶠數公寂寞而已幸惟志之
不宣某再拜

答陳礪隱論詩書

隔違之久每思陸凱之風雅馨香故人秦樹吳
江梅花一枝爲之寓某無陸君之風雅有故人
之馨香越山台嶽去年輒以詩八首爲之贊昔

陸氏茂范君之報今某切希畋之瓊瑤不知何
以勝據焉况四始六義之莫備匪萌是望伏蒙
希畋錫以長牋飾之過詞不勝其驚悸而後踴
躍也敢一二陳之某始者匠故交之爲詩希咸
通季初貢於小宗伯試禹拜昌言賦翼日罷特
持斯賦於先達之門忽叨見錢之目俗云以詩爲末錢而
市物以賦爲是時張喬許彬林希劉皆咸有言
名而退飛不已某旣竊其目尤疾二三子落空

拳之所不敢俟終日遂更以賦數年以賓榻之
無才畫勝景之多餘暇不能忘情於舊輒薦披
榛馬子以寓誠敢期希畋之是知乎錫以長牋
飾之過辭初捧之而驚悸旋諷之而踴躍踴躍
之謂如見古賢焉何也希畋示以先立行次立
言言行相扶言爲心師志之所之以爲詩斯乃
典謨訓誥也且詩本於國風王澤將以刺上化
下苟不如是曷詩人乎今以世言之者謂誰是

如見古賢焉况其籠絡乎天地日月出沒其希
夷恍惚着物象謂之文動物情謂之聲文不正
則聲不應何以謂之不正不應天地籠萬物物
物各有其狀各有其態指言之不當則不應繇
是聖人刪詩取之合於韶武故能動天地感鬼
神其次亦猶琴之舞鶴躍魚歌之遏雲落塵蓋
聲之志也琴之與歌尙爾况惟詩乎且降自晉
宋梁陳之來詩人不可勝紀莫不盛多猗頓之

富貴疊隋侯之珍不知百卷之中數篇之內聲
文之應者幾人乎大唐前有李杜後有元白信
若滄溟無際華嶽干天然自李飛數賢多以粉
黛爲樂天之罪殊不謂三百五篇多乎女子蓋
在所指說如何耳至如長恨歌云遂令天下父
母心不重生男重生女此刺以男女不常陰陽
失倫其意險而奇其文平而易所謂言之者無
罪聞之者足以自戒哉逮賈浪仙之起諸賢搜

九仞之泉唯掬片冰傾五音之府只求孤竹雖
爲患多之所少奈何孤峰絕鳥前古之未有咸
通乾符之際斯道隳明鄭衛之聲鼎沸號之曰
今體才調歌詩援雅音而聽者懵語正道而對
者睡噫王道興衰幸蜀移洛兆於斯矣詩之義
大矣哉若某也誠未足與言而已矣自向叨希
吹珠邱金坑口諷心降之言其復家傳與言身
周雄文者乎乃惶惕銘戴之無窮伏惟察而憐

之不宣某再拜

與羅隱郎中書

故表丈遺文盛序古人之重存歿爰捧諾金感涕之誠實刻肌骨然以郎中十五兄相逢京輦得志金蘭雖備熟於行文恐未周於平昔而某以內外之戚始終所諱敢以少才爲之前序誠以麟經下筆諸生而不合措辭而馬史抽毫漢代而還陳別錄伏惟慈造必踐前言西望禱祈

可以鑒料

啓

南海韋尙書

某伏念高爲碧落詎側管以能窺深作滄溟固
持蠡而莫測焉可愛賁瑣智直杖小才叙昴宿
之鍾蕭述尼山之降孔旣將越禮誠可加刑然
則有曠代之遭逢獲千年之際會設若旁扃辯
囿內過言泉不惟上負於良時抑亦下辜於卑

志是致齋身搦管沐髮裁辭伏惟尙書象外三
山人閒七寶體天地方圓之製法陰陽昇伏之
機自從見作人龍翔爲鳥鳳騰輝瑞牒流慶皇
家文章則游夏固遷事業則伊臯周召飛揚天
上踐履朝端且自古六官所重莫先於吏部逮
今貳職所難無出於侍郎而尙書五陟東西兩
司銓管矧復品量庶彙選度羣材載萬乘之安
危繫四方之休戚晉魏則大難斯地國朝尤不

易其人歷數除書少聞再命朝廷不欲止於鴛
省便入鳳池須加分閭之尊用飾作霖之盛特
以番禺巨壤南越名區外控蠻陬旁通番貨昔
者石門酌泉之事合浦還珠之風日月遷綿規
程革易以尙書勵辭玉留錢之節執投香載土
之心用將揭二賢廉潔之波新五嶺崎嶇之俗
俾以佩豹韜而直下建龍節以遐征非止鎮臨
且申龜鏡昭然足驗儼若可觀然後飛驛騎以

徵黃降鵠書而命說恢張帝道陶冶生靈所以
知高祖創基太宗纂業更得無疆之祚仍歸有
截之風何以言之伏以尙書萬頃包含千尋峭
拔膺嶽峻河清之數切飲氷食蘗之誠識洞古
今居無喜愠將以鏘履聲而朝紫殿擴心秤而
啓洪鈞自然道臻於堯舜義軒時復於禹湯文
武百蠻向化萬國歸心雖在愚蒙亦能辯識而
某器同魏瓠凡若莊樗握無蛇口之珍額有魚

身之點今者遽持幽賤獲覲旌幢競營方忝於
拂塵獎遇旋叨於薦賦且凡開場試士就鋪屬
詞從物外之課虛向燈前以應限縱若仲宣閣
羣公之筆長卿量陳后之金空有所長或聞未
至况某雖勤篆刻且昧精奇張平子固合陋都
陸士衡所宜撫掌寧期尙書親廻嚴重庭賜褒
稱變泥沙爲丹雘之姿植菅蒯作芝蘭之秀魯
史驟榮於一字晉庭俄採於片言超越尋常震

驚流輩况方今武功艸偃文教風行計奔歲貢

於九州榜擢詞人於都省至如生於艸澤來自

溝塍或能文有關中甲乙求登殊尤選蓋止於同

人延舉先達吹噓未嘗有聖日名侯大朝重德

面開金口首借丹梯以此推言便宜自賀瑤枝

玉榦虛扁皓月之中羽駕雲裝寧遯碧霄之外

已知蹇步可造遙程藉以宇內跡單天涯親老

一旦有茲殊遇得此吉祥買臣何媿於負薪毛

義實榮於捧檄感深唯泣喜極翻驚瀝膽墮肝
空寓鄭莊之驛糜軀碎首何裨元禮之門攀謝
兢惶罔知所措下情無任戰越悚惕屏營之至
薛推先輩

某體物非工屬詞無取每欲效顰於越女常思
裂撰於靈光今者先輩提江筆以雲飛擲孫金
而羽化賢愚塞望遠近騰聲凡是懷刺來人操
觚學者莫不競爲市誦爭作鏡窺所以恥不遊